



Tal organism european che al met dongje lis principâls lenghis minoritariis dal Vieri Continent e je jentrade ancje la Arlef in rapresentance de Regjon. Il sô diretôr, **William Cisilino**, al spiegate cuâi che a son i obietîfs de iniziative. » DI **CHRISTIAN ROMANINI**

Puartis viertis in Europe

Ametât di Novembar a Bruxelles si à tignude la presentazion de 'European Roadmap for linguistic diversity' ('Percors european pe diversitât linguistiche'), che si pues lei ancje par furlan sul sît dal 'Network to promote linguistic diversity' (<http://www.npld.eu/current-projects/language-planning>), l'organism european che al met dongje lis principâls lenghis minoritariis dal Vieri Continent. Indi vin domandât di plui a **William Cisilino**, diretôr de Agenzie regionâl pe lenghe furlane, che tal Npld e rapresente la Regjon Friûl-V.J.

Ce proviodie cheste Roadmap?

"L'obietîf al è di stiçâ l'impegn de Union europeane a pro des lenghis, che tai ultins dîs agns a son stadis metudis di bande de agjende politiche. E no feveli dome di chês minoritariis. Il document al fevele di dutis lis lenghis de Europe. La Roadmap e disegne lis tapis par fâ in mût che la Ue ur torni a dâ a dutis la dignitât che a mertin".

Parcè tai ultins agns la atenzion de Ue pes lenghis e je smamide?

"Si à tacât a notâ un gambio drastic in piès di cuant che a son jentrâts i Stâts dal Est. Che-

scj Stâts, ma ancje cetancj Stâts fondadôrs de Ue, no vuelin che Bruxelles e meti il nâs sul teme des lenghis, massime di chês di minorance. Cun di plui, dîs agns indaûr al è lât in pension il Diretôr gjenerâl de Comission che al à fat di plui pes minorancis: il furlan **Domenico Lenarduzzi**. E lis ideis a cjaminin su lis gjambis dai oms".

Cemût ise strutturade le 'roadmap'?

"Tal document si ricuarde che lis lenghis a àn un rûl determinant pe coesion sociâl, pal svilup personâl, sociâl e economic e ancje pe mobilitât. Par chest, la Union europeane e je clamade a meti in vore une politiche a pro dal multilinguism che nus plâs definî 'olistiche'. Chest valorizant l'ûs des gnovis tecnologiis, viarzint ducj i bants europeans a dutis lis lenghis e tornant a creâ une linie di finanziament di pueste par chês minoritariis".

In tropis lenghis isal stât voltât chest document?

"Il document al è disponibil ancje in lenghe furlane, dongje des versions par inglès, francès, spagnûl, catalan e basc. O crôt che al sedi un biel ricognossiment simbolic par nô".

Cualis sono lis funzions dal Npld e cuant ise jentrade la Arlef in cheste Rêt?

"Il Network al è stât creât di passe trente sogjets des minorancis propit par meti adun une sorte di sindacât a Bruxelles par promovi e par difindi lis nestris identitâts. Ta chest contest, la Agenzie e je il braç operatîf de Regjon, che tal 2014 e à aderît al Network midiant dal Consei regionâl".



ilfriuli@ilfriuli.it

FRIUÏ@EUROPE

Confront a Udin su lenghis e dirits

Une gnove ocasion par fâ il pont de situazion su lenghis, dirits e tutele, tra Friûl e Europe. E je chê che e ven ufierte di 'Friûl@Europe. Lenghis, dirits, creativitât e promoziun dal teritori', la cunvigne che si davuelzarà ali de Universitât dal Friûl inte buinore dai 11 di Dicembar. L'apontament al è a tacâ di 9 e mieze te Sale Florio, in bande de sede dal Retorât dal Ateneu furlan, là che si daran dongje rapresentants des comunitâts di lenghe furlane, slovene e todescje de regjon Friûl-Vignesie Julie e esperts e operadôrs.

Al sarà un confront tra personis che a lavorin tal cjampe de promoziun des lenghis minoritariis e in chel de organizazion di events e di ativitâts culturâls e artistichis. Tant a dî: il 'logos' - la lenghe - che al devente 'logo', une marcje di cualitât e di ricognossibilitât par prodots, servizis e teritoris, intune prospetive di svilup sostignibil no dome in tiermins economics e sociâi ma ancje par ce che al tocje il rispjet dal ambient, des identitâts e dai dirits linguistics.

SCOLTADIS DI DRIUS

Di butâ vie

Co le me femine e tache a butâ vie ce che no i covente plui jo, par un pâr di dîs, no mi fâs jodi par cjase.

Euronews informa

De Provincie di Udin, 60.000 euros dâts fûr a scuclis e istitûts di musiche



Ascuclis e istitûts di musiche cun finalitâts professionâls a son stâts indreçâts 60 mil euros di contribûts di bande de Aministrazion provinciâl di Udin. Si trate di sovenzions dadis a 14 realtâts che a operin sul teritori provinciâl

cun finalitâts claris: dâ une man par otignî il diplome professionâl intun strument musicâl, e disciplinis zontadis, e il cjant. In chest mût il plan di ripart pal an scolastic 2015/2016 relativ a la leç regionâl n. 15 dal 1988 (che e rivuarde i finanziaments dâts fûr a scuclis di musiche) al va daûr dai criteris gjenerai e specifics de deliberazion de Zonte dal 2010 relative ai obietîfs istituzionai indreçâts a la promoziun e difusion de musiche, massime fra lis gnovis gjeneraziuns. "O sin cussients che ancje chesist realtâts, intun teritori come il nestri dulà che la culture musicâl si cjate ben presint ator ator e si svilupin lis potenzialitâts dai gnûfs artiscj, a àn di jessi sostignudis cun fuarce, ancje se o stin traversant temps di cri-

si. La musiche e je culture e e rapresente une sorte di imagin e di promoziun de identitât. E je dentri di un lengaç universâl che al da la pussibilitât ai zovins di vivi emozions e di confrontâsi cun artiscj di vuê e di îr. Par chest o din une man a lis scuclis e ai istitûts che a dimostrin di otignî risultâts concrets", al declare l'assessor provinciâl a lis Ativitâts ricreativis Beppino Govetto. "Al va ricuardât dongje - al zonte Govetto - l'aspiet dal lavôr: dentri des scuclis di musiche a cjatin lavôr diviers zovins diplomâts tal nestri Conservatori che cussì a àn la pussibilitât di fâ madressi une esperiense di insegnament che no sarès pussibil in altrî mût. Graciis a lis scuclis di musiche, cun di plui, si cree un substrât di culture musicâl

che e fâs inçressi il nivel di sensibilitât e preameant des diviersis propuestis". Un contribût di 6 mil e 750 euros, al è stât dât fûr a la Associazion musicâl e culturâl de citât di Codroip. 5 mil 250 euros a son stâts inveziat destinâts sei a la Fondazion Luigi Bon di Tavagnâ, sei a la Associazion musicâl e culturâl "Armonie" di Sedean e al CEDIM, Centri di educazion e divulgazion musicâl di Gonars, un finanziament di 4 mil 250 euros al è lât a trê realtâts: gnove bande comunâl di San Zorç di Noiâr, al grup folcloristic di Passons e a la associazion culturâl e musicâl Euritmia. A la Associazion Amis de Musiche di Feagne, a la Scuole di musiche diocesane di Mortean e a la Societât Filarmoniche L. Mattiussi di Dartigne a son stâts dâts 3 mil 750 euros par om. In fin, la sovenzion di 3 mil 250 euros e je stade assegnade a la Associazion musicâl de Cjargne, a la gnove scuole diocesane di musiche di Vildivar e a la bande musicâl Primevere di Rivignan.